

Signurs territorials dal temp autmedieval

Part 2: Famiglias d'alta noblezza

De [von] Vaz

Schlatta da baruns en ina posiziun sumeglianta a quella dals conts, estinguida il 1337/38. Attestada per l'emprima giada il 1135 cun *Gualterio de Vazio*. La sedia principala dals de Vaz era il chastè da Nivagl, pli tard quel da Belfort. Il center da lur domini vegn menziunà gia en l'«Urbari curretic dals bains imperialis» (ca. 840). Nivagl è documentà sco in dals chastels archeologicamain ils pli vegls da la Rezia Sura (10avel/11avel tschientaner tempriv). Da là è la famiglia sa derasada sur grondas parts da la Rezia Sura, nua ch'ella era enturn il 1270–1333, sper il chapitel catedral da Cuira, la pussanza politica la pli impurtanta. Fin il 1299 han ils baruns de Vaz possess en pegn l'avugadia imperiala sur il chapitel catedral da Cuira, pli tard quella sur il contadi da Lags (in feud da l'Imperi austriac). Dretgs al nord dal Lai da Constanza (Linzgau), vendids en il 13avel tschientaner, sa basavan oravant tut sin dretgs da possess attribuids a la baselgia parochiàla da Seefeld. La proprietad dals de Vaz consistiva oravant tut d'agens bains, da feuds dal chapitel catedral da Cuira, d'avugadias e da pegns. Lur lieu sepulcral sa chattava en la claustra da premonstratens a Curvalda, fundada eventualmain dad in member da la famiglia.

Walter I, debitur da la vischnanca da Plür il 1135, cumpara il 1158 sut il num da *Walter de Sevel* sco avugà da la baselgia da Seefeld. El aveva dus figls, Walter II e Rudolf. Quest ultim era maridà cun Williburg, figlia dal cont Manegold II dad (Alt-)Veringen, ed è attestà il 1192 a la curt da l'imperatur Heinric VI a Hagenau (Alsazia). Il figl da Rudolf, Walter III (attestà ca. 1200–54), ha maridà Adelheid, probablmain ina baronessa da Rapperswil. El ha vendì il possess a Linzgau (la plipart a la claustra cisterziensa da Salem), ha laschà eriger il chastè da Belfort ed ha promovì la fundaziun da la prepositura da premonstratens da S. Giachen a Claustra. Il figl da Walter III, Rudolf III (documentà il 1222–29), cumpara era sut il num «von Rapperswil». In ulteriur figl, Walter IV (documentà il 1216–54), era maridà cun gronda probabilitad cun ina figlia dal cont Hugo I de Montfort. Cun il descendent da quels, Walter V, han ils de Vaz, orientads dapi alura fermamain a la Chasa Habsburg-Austria, cuntanschì ina culminaziun. Johannes (documentà il 1284–99), in figl da Walter V, stava oriundamain, sco ses frars Donat e Walter VI (documentà il 1289, † avant il 1295), sut l'avugadia dal cont Hugo II de Werdenberg-Heiligenberg (in partisan dal retg Rudolf) ch'ha



Il chastè da Belfort ha furnà la sedia principala dals de Vaz ed è vegni pli tard en possess dals von Toggenburg.

FOTO J. MENOLFI

conclus il 1289 in contract da feud ereditar cun ils Guaisers da Tavau. Il 1299 ha Johannes cedi a l'investg da Cuira cunter in pajament da la summa da pegn l'avugadia sur il chapitel catedral ed è alura mort pauc pli tard. Donat è stà ditg en opposiziun cun ils investgs da Cuira. El ha pers il 1333, malgrà il sustegn da mercenaris da Sviz, ina battaglia impurtanta cunter l'investg e parts da la noblezza retica. Sia ierta è ida sur las figlias Kunigunde ed Ursula als conts de Toggenburg resp. als de Werdenberg-Sargans, il Partenz d'Amez sur Margarethe, ina figlia da Walter d'emprima lètg, als chastellans de Matsch. In'ulteriura figlia da Walter ha maridà il 1308 il barun Walter IV de Eschenbach.

Jürg Leonhard Muraro

Von Toggenburg

Schlatta da baruns attestada a partir da ca. l'onn 1200, dapi il 1209 sco conts. Ils Toggenburg figureschan en las funtaunas l'emprima giada sco *Toccanburg*, alura sco *Tochimburg*. Ina derivanza da la famiglia dal Zürichgau u da la Germania dal Sid è pensabla. Sut Diethelm (1210?–ca. 1230) e ses ertavels ha la famiglia pudì consolidar sia posiziun en il Toggenburg Inferiur cun s'alliar tras maridaglia cun autras famiglias da conts (Montfort, Werdenberg, Frohburg-Homberg). En Currezia han els obtegni impurtanza tras la maridaglia da Friedrich (1315–64) cun Kunigunde von Vaz. Tras quella èn ids Belfort (1337/38) ed Unter-Tagstein/Masagn (1342) en ils mauns dals Toggen-

burg. Chapital, cumpetenza militara e prestige regiunal han procurà a Friedrich avantats decisivs en la cuntraversa per l'ierta dals baruns de Vaz. En il 14avel tschientaner èn ils dretgs signurils da la famiglia s'amplifitgads marcantamain tras l'acquist da possess e pegns. En la Currezia han els acquistà il 1338/44 tras cumpra dals Aspermonts parts dal signuradi da Stels (tranter auter ils chastels da Fracstein e Solavers/Sievgia), il 1351 dals Straiff's Ober Sansch-Kapfenstein/Cuvlignas, il 1354 dal duca Albrecht il chastè da Marschlins/Eigias (sco feud), il 1355 ed il 1359 dals von Windegge resp. dals conts de Werdenberg-Sargans il signuradi da Maiavilla. Il 1338 possedeavan els, sco marschals ereditars episcopals, il chastè da Wynegg/Malans, il Scanvetg e Tavau sco feuds da l'investgiu da Cuira. Il 1394 era er la fortezza da Castels en possess da Friedrich VII († 1436). Quel onn è il signuradi da Toggenburg vegni dividì, Friedrich VII ha dentant puspè reunì il 1401 tras cumpra bunamain l'entira ierta. Il 1403 ha el survegnì tras decisiun da la dretgira il chastè da Strahlegg/Fadrein ed ha conquistà il 1435 Neu-Aspermont. Cura ch'el è mort il 1436 (senza uffants), èn ils territoris d'origin dals Toggenburg passads als de Razén e von Raron, ulteriur possess allodial als von Montfort-Tettang, de Sax-Mesau, von Brandis e von Aarburg. Per tema d'ina separaziun dals territoris signurils e lur cessiun als Austriacs, èn ils subdits curretics s'unids (cun l'approvaziun d'Elisabeth von Matsch, la vaiva da Friedrich VII) il 1436 a Tavau en la Lia da las Diesch Dretgiras.

Adolf Collenberg

Von Matsch

Noblezza chavaleresca menziunada dal 12avel fin il 15avel tschientaner, originara dal Vnuost; en il 14avel tschientaner è ella sa stabilida en la Rezia ed en la Germania dal Sid. Sper feuds dals conts dal Tirol possedeava la famiglia las chastellans da l'investgiu da Cuira sur ils servs da la Chadè en il Vnuost, la Val Müstair e l'Engiadina sco era l'avugadia ecclesiastica sur las claustras da Mariamunt e Müstair. Els èn sa parentads tras maridaglia cun ils Vazs, ils Werdenberg-Sargans, ils conts von Kirchberg (da la regiun dad Ulm) ed, en il 15avel tschientaner, cun ils Toggenburgs. En ils onns 1209–21 è Arnold stà investg da Cuira. Ulrich (I, menziunà il 1272–1309), en lita cun la claustra da Mariamunt, ha fatg decapitar il 1304 l'avat da quella ed è sin quai vegni excommunicat ed alura assassinà da ses nev Eginno. L'avugadia sur la claustra è silsuenter passada ad Ulrich (II), figl minorend dad Ulrich (I). Il 1338 ha quel acquistà, ensemen cun Friedrich von Toggenburg, dals signurs d'Aspermont bains e dretgs en il

Partenz ch'els dus han administrà communablamain fin il 1344. A partir dal 1335 han ils Viscontis da Milaun empruvà d'extendere lur egemonia sin ils possess dals von Matsch a Clavenna, Buorn ed en Val Puschlav, quai ch'è era reussi ad els il 1350. Il 1348 è Ulrich II sa mess sut la protezzion dals signurs territorials, ils conts de Tirol, als quals èn suandads suenter il 1363 ils ducas d'Austria (Habsburgais). Grazia al matrimoni dad Ulrich (III), figl dad Ulrich (II), è la famiglia daventada proprietaria dal contadi da Kirchberg, s'acquistond il titel da cont, la vopna ed il num. Per las numerusas caricas adimplidas en servetsch da l'Austria fin la fin dal 15avel tschientaner, tranter las qualas surtut quella dal chapitani general dal Tirol, èn ils von Matsch vegnids recumpensads cun bains cedids ad els en furma da pegns e feuds. Il conflict ch'ha opponì il 1392 Ulrich (III), sustegni temporarmain da l'Austria, a l'investg da Cuira, è vegni terminà pir il 1421; la famiglia ha dentant stuì renunziar en favur dal chapitel catedral da Cuira als dretgs d'avugadia sur ils servs ecclesiastics ed (en barat) ad in'indemnisaziun, als chastels da Greifenstein, Steinsberg e Ramosch, acquistads a partir da la mesadad dal 14avel tschientaner. La figlia dad Ulrich (III), Elisabeth, ha maridà Friedrich VII von Toggenburg, il davos exponent da sia schlatta. Suenter la mort dal consort (1436), ha ella fatg valair pretensiuns da sia ierta, en la partiziun (1437) tranter ils von Aarburg, von Brandis, von Montfort-Tettang, von Raron, de Sax-Mesau ed ils chastellans von Matsch ha ella survegnì in'indemnisaziun finanziaria. Ses nev Ulrich (IV) ha segirà a la famiglia il chastè da Castels en il Partenz. Il 1471 han Ulrich IX e ses figl Gaudenz acquistà dal duca Sigismund las Sis Dretgiras en il Partenz ch'èn dentant restadas mo sis onns en possess da la famiglia. En consequenza da la pressiu politica ed economica creschenta ha Gaudenz, l'ultim represchentant masculin dals von Matsch, stuì ceder a partir dals onns 1480 parts pli e pli grondas da sia proprietad. Sia figlia Katharina è morta il 1514.

Martin Leonhard

Von Werdenberg

Famiglia da la noblezza auta dal 13avel–16avel tschientaner cun bains e dretgs che s'extendan dal Lai Rivaun fin al Vorarlberg e dal territori retic fin en il spazi da la Svevia Superiura. Ils Werdenberg èn sortids sco agen rom da la schlatta da conts von Montfort en in process da divisiun ch'ha durà da ca. l'onn 1245 fin il 1260. Sco progenitur vala Rudolf de Montfort che cumpara il 1243 en l'Italia en la suita imperiala ed a Cuira a la testa da la noblezza retica. Entant che Hugo († 1255), ses frar pli giuven, ha surpiglià il possess a dretga dal Rain dals Mont-

forts, è Rudolf sa concentrà sin la regiun da Sargans ed il Gonzen, danunder ch'el fascheva controllar il traffic per l'Arlberg e per l'Italia. Suenter sia mort il 1247 han sia vaiva Clementa von Kyburg ed ils figls Hartmann (1254–65) e Hugo (1254–80) consolidà il signuradi en quest territori. Il 1250 resp. avant il 1260 han els fundà ils centers signurils da Sargans e Werdenberg ed han institui in'atgna administraziun. Clementa e ses figls represchentavan, al cuntrari dals Montforts, ina politica antistaufica. En ils onns 1258–60 è la divisiun stada accumulada, en quel mument pia ch'els figls Hartmann e Hugo han surpiglià lur cumpart dal rest dal possess cuminaivel e da la noblezza da servetsch dals Montforts. Pauc pli tard han era els parti l'ierta dals geniturs ed han fundà fin enturn il 1290 las duas lingias principalas dals Werdenberg-Heiligenberg e Werdenberg-Sargans. Socialmain han ils Werdenberg fatg part suenter il 1264 fin viaden ils onns 1380 da la stretga suita e dal signuradi territorial dals retgs habsburgais. A partir dal 14avel tschientaner èn els stads activs, cun success, sco interpretiders militars. La lingia dals Werdenberg-Sargans metteva ils uffizians da Riva ed è stada fin enturn il 1300 en possess dal signuradi da Greifensee ch'ella ha obtegni, sur Kyburg, da l'ierta da Rapperswil. Suenter il sustegn da l'investg da Cuira en l'uschennada Faida da Vaz (1335) ed il matrimoni cun la figlia ereditara dals baruns de Vaz, han ils Werdenberg-Sargans survegnì il 1338 da l'investgiu da Cuira ils feuds dals de Vaz en la Rezia Sura, tranter auter il contadi da Schons cun il Valragn e Balamburtg, la Stussavgia, il Scanvetg ed il chastè dad Ortenstein en la Tumleasta ch'è restà fin il 1516 lur sedia centrala. Il 1342 han ils Werdenberg-Sargans parti il possess. Il rom dals Werdenberg-Sargans-Vaz ha surpiglià, sper l'ierta dals Vazs, la part dal contadi da Sargans a sanestra dal Rain, entant che quel dals Werdenberg-Sargans-Vaduz ha obtegni la part a dretga dal Rain cun ils chastels da Vaduz, Blumenegg e Nüziders. En ils onns 1390 è la famiglia vegnida successivamain sut squitsch da l'Austria ch'aveva interess territorials en la Val dal Rain. En l'uschennada Faida da Werdenberg, en la quala l'Austria era s'alliada cun l'investg Hartmann ed ils Werdenberg-Sargans cunter ils Werdenberg-Heiligenberg, han quests ultims pers bunamain l'entir possess, cun excepziun da Werdenberg. La Faida da Belmont dal 1352 (cun las bartaglias a Porclas ed al Mundaun) era probablmain prorutta surtut per motivs d'ierta: Anna, la davosa represchentanta dals Wildenbergs e figlia da la Chasa da Sagogn, era maridada cun Hugo IV de Werdenberg-Heiligenberg. Suenter la sconfitta da Jörg en la Guerra da Schons cunter ils subdits revoltants e la destrucziun dal chastè da Balamburtg, han ils Werdenberg-Heiligenberg vendì il Schons a l'investgiu (1456). La lingia dals Werdenberg-Sargans da sia vart ha stuì impegnar il 1396, sut squitsch finanziàl, il contadi da Sargans a l'Austria, curt suenter ch'ella aveva cedi Rheineck ed Altstätten, ed ella ha era stuì surlaschar la chastellania imperiala e sa retrair en lur signuradis en la Rezia Sura.

Martin Leonhard



Vopna da la noblezza chavaleresca von Matsch (illustraziun da ca. 1450–1480).

Lexicon Istoric Retic

Il LIR cumpiglia bundant 3100 artigels (geografics, tematics, artigels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.